


**CAO GIEX KAING: PLAK KAWN KHRIT
MAI:
PA IM JU DAUX KRAX RAWG BWAN:**

(စောဒီယာပို့ခါးမေတ္တာင်မူနှင့်အဲထာင်းမြှုပ်စာကိုယာ)



**Rev. Ngox Khun Pen
(2004)**

LoxTawm:

Mawh kheu Siyiex paoh daux krax ka son ex, mai: ex baox pon akhwang: tix tiem lai grawng: cao giex kaing: plak kawn Khrit mai: pa im ju daux krax rawg bwan:heue. In mawh daux krax pa cox pa khre Siyiex, pa mawh ceu pa ting bwan:son tete telai heue. Mawh kheu nan, exyaog yaw bwan son Simieang Siyiex ting ting lhaong lhaog heue.

Krax pa bak pa keut ex son pa tiem ex lai in, mai: yuh mawh phuk lai ieak tix phuk, kheu keut pot jun pot ex tix sang kieh mawh pa teei rieang rao, son cao giex kaing: khawm uik heue. Cao giex kaing plak numli, Cao giex kaing: plak baux veng, cao giex kaing: plak ceucao, cao giex kaing: plak nyiex ma kawn Khrit khankix, mai: cao giex kaing: ka dau cubcaw, mai: cao giex kaing: kawn Khrit dee yuh kaing ku dah ku dee heuc. Phuk lai in, ex keut sonsang chix shao ka son pa gau, yam yuh krax gau ka dee mawx angah heue. Ex tiem lai in, sonsang mawh pa kieh kawn khrit khawm uik khaw caw daux krax daux blawng: krax rawg bwan,:mai: sonsang viex kawn Ceucao ku kaux khawm rhawm khawm thi tix rawg bwan:rawx rawx mox mox, kriem kriem krie krie heue.

Kieh bwan son pa nhim pa gaux rhawm, mai: bwan:son pa ting rieang daux krax rawg bwan lih grum lih naog ka pieang can pwi pa phat lai in, mai: pa shao kieh koé bwan,:mai: pa coca tix hawt jawh yuh awm pa hoik mhong hoik tawng tix ku kaux daux pwi lieak.

Rev. Ngox Khun Pen
Cao Bung: Kaing Ku Ceu
Numli Vax Kawn Khrit Com Rawm:

Coa giex kaing mai: krax rawg bwan:

Pa ang koe ang chix tete telai, son can pwi pa yuh kaing jhaw Siyiex khankix khawm uik, mawh krax rawg bwan:heue. Phan ang koé ping nya, mai: phan ang koe mau khri, ca kawn chix, vieang mawh nan phan ang koe krax rawg bwan:mai: krax yum rhawm, pon ang doh chix tete telai heue. Rieang rao mai:siawp sibrawm pa ting pa lhaong ka daux kaing jhaw Siyiex khawm uik, mawh krax yum rhawm mai: krax rawg bwan:heue. In mawh num jiah, pa tawx Siyiex ka son kaing jhaw Nawh Cao heue. Mawh kheu nan can pwi pa yuh cao giex kaing: mai: can pwi pa yum rhawm khawm uik khawm leeing, kheu hoik mawh pa im ju hawt Alo Siyiex, mai: pa yuh Alo Siyiex pa ting ceu khaing paox tix, mawh krax rawg bwan:mai:krax yum rhawm pa ting ceu heue. phan rawg bwan:tom nie, pon sibrawm tom nie, phan ang rawg bwan:ceeix pon sibrwwm ceeix, phan rawg bwan, ang koe sibrawm heue.

Cao giex kaing pa hoik dawg koe sivoe ex tom dix dix, maw pa yuh kaing mai: krax rawg bwan:heue. Cao giex kaing pa ah nan, sang ah ka pwi pa giex kaing:plak ku ceu heue. Cao giex kaing plak hahtier, cao giex kaing plak nyiex ma mai: plak ku ceu, mawh cao giex kaing: khankix heue. Mawh cao giex kaing: plak pa tix ang ah, phan ang koe krax rawg bwan mai: krax yum rhawm, ang chix kaux cong heue.

Ka pieang hak tiex in khawm uik phicaox satan hoik ot ku dah ku dee mai: mawh simieang giex kaing: haktiex pa faik, mai: mawh cao nyaw cao glaw tix kieh laux leeing heue. Phan ex mawh pwi Siyiex ex tak yaox tix kham geu pa nyaw glaw phicaox tete heue. Do nie mawh ka pwi giex kaing: plak nyiex ma kawn khrit, mai:daux Ceucão, mai:daux kaing jhaw Siyiex khawm uik heue. Mawh kheu nan sonsang pon thang tix tik, mai: sonsang pon tieb tie ka jhawm lhak phi caox khankix, ang chix tix shao kraung naing tang ceu, mawh ngie kraung naing krax rawg bwan:, mai: krax yum rhawm pa chix pex ka heue. Mawh kheu nan. Yesux tom gau ex rawg mai: thong ex rawg bwan:,mai: yam rawg bwan:kawx, ot sinax ex mai: ot tau mai: ex, mai: Nawh Cao baox rawg bwan:ka son ex heue. Yesux hoik ceep exka kraung naing pa pex, pa

mawh krax rawg bwan; mai: krax yum rhawm, sonsang giex kraung naing an, mai: puing naing ka kruh naing pa faik ku singaix heue. Yesux rawg bwan tom nie, kieh lheu khaing kaing pa yuh Tix heue. Dee bleeh kie nie, mawh awm lox tieak kwad tom ju dix pa ah nin, yuh kaing krax ieak, tieag rhawm krax nie, Pa sang ah lox tieag kwad song khankix, chix tix keut ku ceu heue. Phan keut plak krax rawg bwan:kienie, sang ah grawng pa caw tix rawg bwan lheu kaing pa yuh tix heue. Pwi mawx ang ah, pa ang tien rawg bwan jao kied nie kaing yuh tix, mawh pwi pa yuh kaing mai: alo to kaux tix heue. Phan ex mawh kawn Khrit tete, ex yuh kaing pa tix ang ah, caw tix deuh krax rawg bwan:mawh glawk tix heue. Krax rawg bwan:ang koe mee, ang koe dee die, ang koe ceu pa tieak pa cheu, mawh pa lo tix yuh ku bawg ku yam mai: lo tix yuh ku dah ku dee heue. ang chix tix ah pa ieak pa ting, mai: Ang chix koe pa tawng mai: pa ang tawng, mai ang chix koe pa hot pa mi, mawh pa keung pa caw pwi yum rhawm ku kaux tix yuh heue. Grawh grawng nawh, krax rawg bwan, mawh sinieak nham mai: mawh bhawm pa toek ex plak khwan plak ju heue.

Phan rug mawh cao giex kaing:pa mhawm plak kawn Khrit tete, ang chix tix singai khaing krax rawg bwan, mai: ang chix pon goih tix khaing: krax rawg bwan heue. Phan goih tix singai khaing krax rawg bwan, ang chix mawh Cao giex kaing : plak kawn khrit heue. Cao giex kaing: plak kawn Khrit, mai: cao giex kaing: plak tang ceu, ang doh chix awm paox tix tix bawg kawx heue. cao giex kaing: plak haktiex, mai: cao giex kaing: plak khwan, koe ra ceu heue. Kiem in ra ceu, vieang ceu kaux kiex mawh cao giex kaing: awm paox tix kawx, kaing yuh kiex angah, " mhai " dee sang hoek kiex angah, lox krai lox lao kiex angah, kraung pa shao kiex angah, krax pa keut kiex angah, mai: krax bung krax thong kiex angah, ang lai awm paox tix heue. Mawh kheu koe pa tang siyox yuh nan, ex tom krai grawng: cao giex kaing: plak kawn khrit mai: pa im ju daux krax rawg bwan, heue.

Pa sang rom tix keut sawn mai: teei rieang rao ka grawng in, cao giex kaing: plak kawn Khrit, caw tix im ju daux krax pa rawg bwan yuh ka mawx? Caw tix ting rieang daux krax rawg bwan:yuh ka mawx? Krax rawg bwan, ting ceu son cao giex kaing: khankix mie ding? cao giex kaing, mai: krax rawg bwan;dex dawd mai: paox tix yuh ka mawx? shang ka paox tix yuh ka maw, ex sang keut hu tau, mai: sang rom teei rieang rao tix tau heue.

Cao giex kaing: pa mhawm Yesux Khrit

Cao giex kaing:pa lheu mhawm khaing Yesux, ang koe tix kaux kawx, mai: ang koe tix dah tix dee kawx heue. Cao giex kaing: pa awm Yesux pon ang koe tix kaux kawx heue. Grawh grawng: nawh, rieang susai mai: mhai dee sang hoek krax keut mai: kaing:yuh, lox krai mai: krax bung krax thong ku ceu, mawh pa mhawm kheu pa een Nawh rhawm rhi tix ka Siyiex, mai: pa ting rieang Nawh Cao daux krax pa rawg bwan heue.

Yesux rawg bwan:ku bawg ku yam heue. Gau kawn cau Nawh khankix rawg bwan:thong kix hu rawg bwan, mai: sidiex gau pwi ka grawng: krax rawg bwan heue. Pa sang gau Yesux ka kawn:cau Nawh khankix, cao giex kaing: khankix, phan ang mawh krax rawg bwan, ang chix pon yuh cao giex kaing: plak kawn Khrit heue. Kheu cao giex kaing: plak kawn Khrit mawh pa teei rieang rao tix ka daux krax rawg bwan:heue. Yesux pon kham geu yum pieang khax lhak, mai: pon krai lox ploi map ka pwi koeng, mai: tawx ju Tix yuh ka mawx? mawh kheu krax pa rawg Nawh bwan:daux sipeen Kesasemanix heue.

Pa ang koe ang chix ka daux cao giex kaing plak kawn Khrit

1. Krax yum rhawm mai: siawp sibrawm.
(ယုံကြည်ခြင်းနှင့်ဝိယဉ်တန်ခိုး)
2. Krax pa ap pong mai: rhawm thi khwan.
(ဆက်ကပ်ခြင်းနှင့်ဝိယဉ်သဘော)
3. Pa cu ngied ka gum lox Siyiex mai: hawt jawh tix yuh.
(နှုတ်ကပတ်တော်ကိုနာခဲ့လိုက်လျောက်ခြင်း)
4. Pa een rhawm mai: pa rawg bwan.
(ရိုဂုံကိုစားခြင်းနှင့်ဆတောင်းခြင်း)
5. Krax pa meed pa tawng pai: pa yaogyaw bwan son.
(ဒေါက်မြောင်းနှင့်မွေ့လျော်ချိုးမြောင်း)

Krax rawg bwan

1. Krax rawg bwan:mawh pa sikah tau mai: Siyiex.
2. Krax rawg bwan: mawh sinieak nham Khwan.
3. Krax rawg bwan:mawh pa rieb teei sibrawm.
4. Krax rawg bwan:mawh kaing jhaw pa ting.
5. Krax rawg bwan:mawh pa hawt yuh Alo Siyiex.
6. Krax rawg bwan:mawh pa ot tau mai: Siyiex.
7. Krax rawg bwan:mawh pa kham sakse grawng: pa im ju Siyiex.
8. Krax rawg bwan:mawh pa goih tix tawx ka pwi.
9. Krax rawg bwan:mawh pa yuh kaing jhaw Siyiex pa ting ceu.
10. Krax rawg bwan:mawh pa ghreu phicaox lih.
11. Krax rawg bwan:mawh pa toek bhawm plak Khwan.
12. Krax rawg bwan:mawh pa paoh saw bwan son.
13. Krax rawg bwan:mawh pa pon akhwang pa mhawm khaing Siyiex.
14. Krax rawg bwan: mawh kaing krub.
15. Krax rawg bwan:mawh pa tawx tix som ka Siyiex.
(Yuh to kaux tix tiem)
16. Krax rawg bwan:mawh pa yuh naing pa mhawm.

Krax rawg bwan:mai: Alo Siyiex

1. Yesux nhie ex rawg bwan:(Mathiex 7:7)
2. Yesux gau ex ka lox rawg bwan:(Lukax 11:1-4)
3. Siyiex ngied lox rawg bwan:ex (Yaogyaw 34:6)
4. Yesux teem ka lox rawg bwan:ex (Romax 8:26)
5. Yesux rawg bwan:son ex. (Romax 8:34)
6. Yesux ot tau yam rawg ex bwan:(Mathiex 18:19)

Krax rawg bwan pa jhi tix deuh ka daux phuk lai Siyiex

1. Grawng pa greed hoek ka Siyiex

1. Greed hoek ka Siyiex mai Nawh: tak greed hoek ka pex (Yakop - 4:8)
2. Rawg bwan ka aux heue. Mai: Aux tak sang taoh ka maix heue, (Yaogyaw 50:15)
3. Siyiex pa ngied ka lox pa rawg bwan eue, pwi khawm uik tak sang greed hoek ka Maix Cao heue. (Yaogyaw 65:2)

2. Dah dee, dee rawg bwan, pa jhi tix deuh daux phuk lai Siyiex

1. Song siviex rawg bwan daux lawg (Mathiex 6:6)
2. Rawg bwan pieang gawng (Lukax 6:12) (Makux 3:13).
3. Rawg bwan daux sipeem. (Mathiex 16:36) (Makux 14:32)
4. Rawg bwan daux nyiex bwan (Isha 37:13)
5. Rawg bwan daux tieag (Makux 1:35) (luka 5:16)
6. Rawg bwan ku dah ku dee (I Temo 2:8)
7. Rawg bwan daux thawng: (Kawn 16:25)

3. Bawg Yam rawg bwan pa jhi daux phuk lai Siyiex

1. Rawg bwan yam ang praij nyang bax rieang (Makux 1:35)
2. Rawg bwan leng lang sawm: (Luka 6:12)
3. Rawg bwan plak bo, pon ngawb, pon ngaix. (Yaogyaw 55:17)
4. Rawg bwan ang jud ang jai (1 Thesa 5:17)
5. Rawg bwan jheeng jheeng (Efesux 6:18)
6. Rawg bwan leeing ngaix leeing sawm (1 Thesa 3:30)
(Yaogyaw 88:1)

7. Rawg bwan tix ngaix (3) bawg (Daye lax 6:10)
8. Rawg bwan plak bo (1) taix (Kawn cau 3:1:10:30)

4. Pakpeung rawg bwan ku ceu, pa jhi tix deuh daux phuk lai Siyiex

1. Grux ngawng rawg bwan: (Yaogyaw 95:6) (Kawn cau, 21:36)
2. Ngawm tix rawg bwan: (Simieang 7:18)
3. Maong jhak raoma rawg bwan: (Yohan 17:1, 11:41)
4. Cung tix rawg bwan (6 simieang, 24:6, Makux, 4:39, 11:25)
5. Gup tix rawg bwan: (Lih hu 34:8) (Nihamix 8:6)
6. Yaog taix tix rawg bwan: (Yaogyaw 28:2 63:4) (I Temose2:8)
7. Deuh pak ngai sinax singawng tix rawg bwan.

vieang rawg bwan ka pak peung pa yuh ka mawx ang ah, mawh pa kieh rhawm hoek ka Siyiex pa nie ting ceu heue.

5. Daux krax daux blawng krax rawg bwan: ku ceu pa jhi daux phuk lai Siyiex

1. Yien yawg tix rawg bwan: tix kaux nong nong (Mathiex 6:6) (Lukax 5:16)
2. Pwi tix kaux bung thong pwi hu ka krax rawg bwan: (Mathiex 26:26)
3. Ah lox rawg bwan gau Yesux mai: rawg bwan: (Mathiex 6:4-13)
4. Rom tix rawg bwan tau khawm uik, (Mathiex 18:19-20) (Kawn Cau 1:14, 16:14)
5. Phat gum lox phuk lai Siyiex rawg bwan: (Yaogyaw 33, 102, 119, 136, 142) (Kawn Cau 44:23-31)
6. Rhax lai mai: rawg bwan: (Kawn cau 16:25) (Yaogyaw 98, 103, 2:1, 146:6)
7. Tuah pa ih rawg bwan: (Kawn cau 14:23)

KRAX RAWG BWAN TUAH PA IH

Sivoe ang Yesux nyang jah laig daux kaing jhaw pa yuh tix, jah tix rawg bwan tuah pa ih pa un heue.

1. Krax pa raux dee bleeh tuah pa ih mai: rawg bwan

1. Thieang tix tik to kaux tix (Luka 9:23)
2. Tawx ngawh jum
3. Pluat tix tik krax gaux rhawm haktiex
4. Yuh paox mai: Siyiex tom raux tom mox
5. Ap ka Siyiex ceu pa ang chix yuh khawm uik.

2. Rawg bwan tuah pa ih pa jhi tix deuh daux phuk lai Siyiex

(k) Ceu pa caw tix hawt yuh yam rawg bwan tuah pa ih

Krax rawg bwan pa tuah pa ih pa moh Aux ka, mawh pa puik tix tik ka pa ceu pa phyawk pa vien ka pa ang khaw ang caw, mawh pa tah tix tik ka beeh glawm pa cien, mawh pa ploi pwi pa kham geu krax kha rhawm kha rhi khankix kieh kix luan, mawh pa viah tix tik can glawm: cien khankix ang mawh lie?

Mawh pa tawx pwi pa cai rhawm khankix sawm, mawh pa viex pwi pa ang koe dee ot hoek ka nyiex tix, mawh pa yaox ka pwi pa ang yaox tix ceep kraung khankix, mawh pa ang lai via lai ploi ka nex nham to kaux tix ang mawh lie? (Isayax 58:6-7)

(kh) Bwan son pa sang pon khaix hoik yuh krax rawg bwan tuah pa ih

Pa rieang maix, tak lih bleeh awm lih pa rieang pon ngawb, mai: tak sang nyawm ot phai phai heue. Pa rah pa see maix tak sang

hu sivoe maix, Min maix mai: plak ngai Simieang Siyiex tak sang hawt maix, mai: kieh koe pa grum naog heue. Yam kok maix ka Nawh, Nawh sang pawk lox ka maix ah nin "Aux koe heue". (Isayax 58: 8-9)

Krax rawg bwan:tuah pa ih pa un, mawh pa yuh paox pie tau mai: Siyiex. ka daux pa raux pa mox heue. Mawh kheu nan caw tix thieang tik ka alo to kaux tix heue. Pa ih pa un khankix, mawh kraung naing pa kied ting cie Satan heue. Phan tuah pa ih pa un mai: rawg bwan; mawh pa tieb tie mai: pa thieang tix tik alo phicaox heue. (Yam jah 5: 4-5) (Mathiex, 4:3)

3. Krax rawg bwan tuah pa ih, pwi pa yuh kaing Siyiex khankix

(k) Daux phuk lai sigang si pa prim

1. Mose rawg bwan:tuah pa ih (40) singaix (Lih hu 34:28)
2. Eliyax rawg bwan:tuah pa ih (40) singaix (3 samoelax 19:10)
3. Davit yie tuah nawh pa ih mai: rawg bwan:bawg tix blah (Yaogyaw 35:13)
4. Dayelax rawg bwah tuah pa ih (21) Singaix heue. (Dayelax 10:2)
5. Pwi veng Ninavoe rawg bwan:tuah pa ih yam mhong kix gum lox Siyiex (Yonax 3:5)
6. Ceu pwi Isarilax khawm uik rom paox tix yuh krax ploi phimap mai: tuah pa ih rawg bwan: (Liwix 23:27)

(kh) Daux phuk lai sigang si pa khraox

1. Yesux rawg bwan tuah pa ih (40) singaix (Mat 4:2)
2. Yohan baptist mai: kawn cau nawh khankix rawg bwan: tuah pa ih (Mat, 9:14 Mak, 2:10, Luk, 5:33-35)
3. Cao Paw Lux rawg bwan:tuah pa ih pa un (3) sigaix (Kawn: cau, 9:9).
4. Pwi veng Antiuk rawg bwan:tuah pa ih sivoe ang nyang ploi Banabax mai: Pawlux hu dee sidiex lox bwan: (Kawn.cau 13:2-3)

5. Paw lux mai: paox pie naws khankix rawg bwan:tuah pa ih yam hu ka veng Romax (14) singaix, (Kawncau 27:33)
6. Rawg bwan:tuah pa ih son grawng ap cao giex kaing Ceucao khankix (Kawn cau, 14:21-23)

4. Pa jhi daux krax sonsang rawg bwan:tuah pa ih pa un

Krax rawg bwan:tuah pa ih pa un, caw tix yuh hawt awm pa koe daux phuk lai sigangsi Siyiex heue.

1. Dha tix ap ka Siyiex sivoe ang nyang yuh krax rawg bwan: tuah pa ih heue.
2. Dha tix tuah pa ih mai: rawg bwan heue.
3. Dha tix khre rien bawg yam son sang pon rawg bwan:tom nie.
4. Dha tix pluat ploi phimap tix sivoe Siyiex.

5. Pa caw tix hawt jawh yuh yam rawg bwan:tuah pa ih

1. Deuh krax pa bak pa keut maix sidawng kieh dud.
2. Ang caw tix yuh kieh mawh krax pa yaw pa ao min son to kaux tix.
3. Caw tix pex ka alo pa koe min to kaux nex nham.
4. Caw tix koe krax pa bak tix deuh son bawg yam tuah pa ih pa un
5. Caw tix deuh krax rawg bwan tuah pa ih pa un mawh pa tieh loh ka daux to kaux tix heue.
6. Ang caw tix nieb sawn to kaux tix rah see kheu tuah pa ih.
7. Caw tix giex gang ka to kaux tix heue. (မိမိကိုယ်လိုပြုတည်းခြင်း)

6. Son pa caw tix khre rien kaux pwi mawx kaux pwi an

1. Yuh mai: krax yum rhawm yum rhi grawng sang pon pa rawg tix khaing Siyiex (Heb, 11:6) (Mat, 6:18)
2. Paw vi kieh mawh kaing rhoax kaing ran (aye paw)
3. Yam jah tix yuh krax rawg bwan tuah pa ih pa un, paw teei bawg yam tom rheung.
4. Yam yuh krax rawg **bwan tuah** pa ih pa un, teei bawg yam rawg bwan mai: bawg yam **hpat** phuk lai Siyiex tom nie.
5. Rawg bwan son ceu pa tix, kieh si dawng ceu rawg bwan, mai: mhai dee sang hoek heue.
6. Paw vi kieh awm krax tuah krax klaung pa yuh hawt been: been li, paw yuh kieh mawh pa mhawm grang sivoe kawn pwi (Mat, 6: 18, Ro 3: 2, Luk, 17:10)
7. Ciet tix yaox ka rhawm rhi to kaux tix mhawm mhawm, sonsang mawh pa khaw pa caw ka rhawm Siyiex heue.

7. Krax rawg bwan:tuah pa ih pa un, mawh pa yieh pa yeen alo nex nham kieh laux.

Can been li pieang haktiex khawm uik, yuh krax rawg bwan tuah pa ih pa un heue. Krax rawg bwan tuah pa **ih**, mawh pa yeen to karx tix tiem sivoe Siyiex, mai: pa kham: tix tik **alo** nex nham to kaux tix heue. (Yakop 4:10) (Ipet, 5:6)

Mawh pa tawx priex ih priex un tix ka Siyiex, mawh pa tawx bawg yam tix ka Siyiex mai: pa tawx krax keut rhawm rhi tix mai: lox la sikah moing tix mai: rieang rao pa koe tix khawm uik ka Siyiex heue.

8. Krax rawg bwan:tuah pa ih pa un, mawh pa baox yaog tix kieh khwan ju tix baox lhaong glawg heue.

Vieang hoik tiem tix deuh ka daux phuk lai Siyiex pa singax phuk lai pa prim mai: phuk lai pa khraox tom nie, grawh grawng:**krax** rawg bwan tuah pa **ih** pa un kawx, Kheu phi caox(satan) nyaw **glaw** daux rhawm pwi pa sidiex gau gum lox Siyix khankix, son ang sang krai grawng in heue. Mawh kheu nan, plak nie, ang hiex sang sidiex sang krai grawng krax rawg **bwan**:tuah pa ih pa un heue .

Yesux hoik krai sidawng ah nin, phan ang mawh kheu krax **rawg** bwan tuah pa ih pa un, phicaox ang pon tix lih (Mat, 17:21) **Can pa** mawh cao giex kaing ka daux kaing jhaw Siyiex ju dix dix, **Kix tuah pa** ih rawg bwan awm in heue. (Mose tuah **pa** ih (40) singaix ra bawg), (Yam sum veng Ae Yaw Sux tuah pa ih rawg bwan. Yaw sux 7:6) Baux ju Samoelax pwi **ceu** Isarilax khawm uik, **tuah** pa ih mai: rawg bwan. 1 samoelax (7:6-12) Davit tuah pa ih sivoe yuh kaing mai: son phi map pwi ceu. Isarilax khawm uik. Yaog yaw 35:13. Iliyax, Esarax, Esata, Danyelax khankix, kieh krax rawg bwan tuah pa ih, mawh pa ting pa rawx mai: hawt yuh ku bawg ku yam heue.

Krax pa grux ngawng rawg bwan:

Kawn Khrit yan, chix ieak rieang laux rhawm kheu krax ot tix yuh ka mawx? Ceucao mai: nyiex ma kawn Khrit khankix ang koe pa nhim mai: ang koe pa yien yawg yuh ka mawx? Ceucao khankix ang koe krax haok huan, mai: **kaing Jhaw Siyiex** ang haok huan awm pa keung tix haok huan **yuh ka mawx?** phan keut tix yaox tete, mawh kheu sidaing ieak **rieang ieak** rao kawn Khrit ka daux krax rawg bwan heue. **Mawh kheu kawn Khrit** ang rhawm grux ngawng krub ka Siyiex, tom **yaox tix** grux ngawng ka paox kawn pwi heue. **Kawn Khrit** ang cu tix hawt yuh Alo Cao Khrit, pa mawh krax rawg bwan, mai: **Alo Siyiex**

pa keung tix hawt yuh khankix, yuh ngeie sonsang grum naog alo to kaux tix, mai: yuh sonsang koe sire tix khaing:, mawh kheu ceu pa teei rieang rao ka Siyiex daux krax rawg bwan:tete telai, kied ieak rieang daux ex kawn Khrit, mai: nyiex ma kawn Khrit, mai: ka daux Ceucao khankix heue.

1. Krax pa grux ngawm rawg bwan:sang ah ka pa napyam yungyi, mai: pa kham: tix som, mai: pa rawg mhaing greed hoek dex, mai: pa khyo khaw, mai: pa kham geu phimap pa yuh tix heue.
2. Can pwi khawm uik, kawn sang yaox tix grux ngawng sivoe ngai Siyiex tix ngaix sax heue. Khaix an, kawn sang kok Yesux mawh Simieang ting heue. (Phi 2:10) (ISayax 45:23)
3. Dayelax, grux ngawng tix rawg bwan sivoe ngai Siyiex, mai: ang koe pa lhat ka pwi koeng mai: Sivai sang si heue.
(Dayelax 3:6 - 6:10).
4. Ya kop pux Yesux, pon ceu kaux pa jiet mhawm, kheu nawh grux ngawng tix, pie singawng nawh kawx, hoik awm singawng "kalauk" ah nan heue. (Yakop 1 : 5-8, 4 : 3 , 5 : 13-18)
5. Lox pa tieak mai: gum lox Siyiex koe yuh nin, pwi pa blon grux ngawng tix, ang chix yung yieang singawng, chix pon cung kaux cong sijung heue. ang chix lhat graung, mai: Siyiex ot plak nawh jheeng jheeng , mai: teem coi ka nawh tom sidah heue.
(DayeLax 3 : 28-30) (Ipet 4:12) (Lih 3 : 2-4)Ka daux baux ju singaix in, can kawn khrit khankix, mawh kheu ang pwi koe rhawm tix grux ngawng ka Siyiex, kawn khrit hoik som nai plak ku ceu, ka daux krax im ju tix heue.

1.Krax rawg bwan:pa pon bwan:mai: pa ang pon bwan:

Phan rawg bwan:, mawh kheu simie tix pon bwan:son heue. Vieang pwi pa puing " tang " phan ang caw ang tawng ka " tang " pa sang puing tix-chix krox yuh ka mawx? pwi pa puing "tang" ku kaux, caw tix kriem mai: caw tix sidawng ka " tang " pa puing tix heue? Phan yuh nan nawh tom sang chix puing tom krox ka " tang " an heue.

Awm an can ex pwi pa rawg bwan:ku kaux daux pwi, ex rawg bwan:khawm ang tie tawng ceu pa rawg tix kawx koe heue, pa rawg bwan:mai: ang tie tawng ka cao tawx bwan:kawn koe heue. Nawh rawg bwan:mai: nawh thang teei rhawm sang yuh tix khaix, pa yuh nan, mawh pa ang krox " tang " puing tix heue.

1. Krax rawg bwan pa pon bwan

1. Sawg ka Siyiex khawm rhawm rhi tete (Yeramix 29 : 12-13)
2. Rah see heue. (Yaogyaw 34:12)
3. Keut pot krox jun ka Siyiex (Yaog 40:1)
4. Moh ka Siyiex (Yaog 91:14-15)
5. Kaux sijax mai: rawg bwan: (Yaog 145:18)
6. Lhat graung ka Siyiex (Yaog 145:19)
7. Tik ka pa caox pa caig (Yawbax 22:23-27)
8. Mawh pwi Siyiex (6 samoelax 7:14)
9. Via Khaing krax pa lud pa loe. (6 samoelax 7:14)
10. Yeen to kaux tix tiem (6 samoelax 7:14)
11. Rawg pa khaw mai: Alo Siyiex (I Yo 5:14)
12. Hawt yuh been pa moh Siyiex (I Yo, 3:22)
13. Ot ka dux gum lox Cao Khrit (Yo 15:17)
14. Koe rhawm tix mu (Mat 18:19-20)
15. Een rhawm daux ceu kaux Yesux (Yo 14:13-14)
16. Yuh rhawm tix phawng : (Yaog 51:17)
17. Yum rhawm (Mat 21:22)
18. Viex rhawm kua: (Luk 18:1-7)

2. Krax rawg bwan:pa ang pon bwan

1. Deuh phimap daux rhawm tix, (Yaog 66:18)
2. Phan nawh koeng ka Siyiex (Yaog 18:41-42)
3. Phan lud yuh phimap (Isayax 59:1-2)
4. Phan ang cu lox Siyiex (Loxkab 28:9)
5. Phan tieb tie ka lox kok Siyiex (Loxkab 1:24)
6. Phan ang ngied ka lox yo pwi kha rhawm (Loxkab 21:13)
7. Phan mawh pa kin jhawm (Yawbox 27:8-9)
8. Phan krub rieang rao (Yezaje lax 8:15-18)
9. Phan deuh Siyie ang koe ceu (Yeramix 14:10-12)
10. Phan ang pluat phimap tang kaux (Makux 11:25-26)
12. Phan een rhawm ka krax mhawm yuh tix, (Luk 18:14)
13. Phan koe rhawm ra mu (Yakop 1:5-7)
14. Phan ang lai jhak ka Min plak ngai Siyiex (1 Kaw 10:30)
15. Phan krax pa bak pa keut lut (Kawncau 8:23)
17. Phan rawg bwan sonsang pon krax gaux rhawm daux krax pyaw haktiex. (Yakop 4:3)

Ceu pa tieb tie chung ka krax rawg bwan

1. Krax pa koe rhawm nieh, mai: pa ting ngai it. (Loxkab 6:6)
2. Sawn to kaux tix hoik grum naog rieang, mai: keut tix ang lai lo tittix (Plak 3:17)
3. Pa ang rhawm deuh Simieang Siyiex mawh pa ting pa lhaong (Mat 6:33)
4. Pa sipaung to kaux tix, ka daux krax ot krax koe haktiex (Mak 4:19)
5. Pa lheu moh haktiex khaing Siyiex (Yoh, 2:15)
6. Pa gaux rhawm daux phimap (Isayax, 59:1-2)
7. Pa keut tix pon yuh ku ceu ka rieang rao to kaux tix (Phi, 4:13)

Gumlox sijax mu kheu pa hoik deuh sonsang kieh ex rawg bwan:

Simieang Siyiex hoik deuh lox sijax mu kheu Tix, pa mawh lox ting ngawh ting jum pa koe bwan son heue. (2 Pet, 1:4-5)

Lox sijax mu kheu grawng sang ngiet Siyiex lox rawg ex bwan

- | | | |
|----------------------|---|---------------------------------------------------------------------------------------------------------------------------------------------|
| 1. Yeramix 33:3 | - | Kok ka Aux, mai: tak sang pawk heue. Aux tak sang jhi maix yaox pa ting pa lhaong pa raux pa mox, pa ang maix doh tawng tix bawg kawx heue. |
| 2. Yahan 15:7 | - | Phan pex ot ka daux Aux mai: gum lox Aux ot ka pex, pex simie tix rawg ceu pa tix ang ah rawg heue. mai: tak sang yuh son pex. |
| 3. Yahan 15:16 | - | Pex sang rawg ceu pa tix ang ah ka Keeing Cao ka daux ceu kaux Aux. Nawh sang tawx ka pex. |
| 4. Yahan 14:13:14 | - | Mai: pex sang rawg sang mhaing ceu pa tix ang ah ka daux ceu kaux Aux, Aux tak sang yuh heue. |
| 5. Yohan 16:23 | - | Pex rawg ceu pa tix ang ah ka daux ceu kaux Aux ka Keeing Cao, Nawh tak tawx ka pex heue. |
| 6. Mathiex 7:7 | - | Rawg heue. mai: tak sang tawx ka pex, Sawg heue. mai: pex tau sang yaox, Gleuh siviex heue. mai: tak sang paoh son pex heue. |
| 7. Yaog yaw 34:15-17 | - | Simieang Siyiex jhak ka pwi pa rah pa see heue. mai: cu ngied ka lox kok yo kix heue. |

Sivoe ang nyang rawg bwan:

Sivoe ang nyang rawg bwan, caw tix yaogyaw min plak ngai Siyiex mai: caw tix pluat ploi phimap tix, plak sivoe ngai Siyiex heue. Mawh kheu phimap mai: krax phit krax lud kawn pwi ku ceu, mawh pa thox pa tieb ka bwan son pa sang lih hoek khaing Siyiex heue. Mawh kheu nan, sivoe ex ang nyang rawg bwan ang ah, yam rawg ex bwan yam mawx ang ah, ceu pa yaogyaw bwan son mai: ceu pa pluat ploi phi map phighram tix sivoe ngai Siyiex, mawh pa kied ting ceu, pa ang yuh ang chix heue.

Sivoe ang ex nyang rawg bwan ang ah, yam rawg ex bwan yan mawx kawx ang ah, ex caw tix jah yaogyaw bwan son pa yuh Siyiex pa ang chix uik krai heue. Sivoe ang ex nyang rawg bwan mai: krai can ceu pa lo tix ka Siyiex, Siyiex hoik dha tix tawng ka pa lo ex mai: hoik teem coi ka can ceu pa ang ex uik tawng ku ceu heue. Pa tawng kawn pwi ka pa lo to kaux tix, mawh ngie ceeix ceeix khaing, pa tawng Siyiex mawh pa ang kawn pwi uik grum tawng ka heue. Vieang ex chix rawg bwan son can pa lo tix kawx, pa rawg ex ang chix grum maog heue. Sivoe ex ang nyang ba rawg bwan kawx, Siyiex hoik tawx bwan son pa ting pa lhang pa kied haoh kied lheu ka son ex heue. Mawh kheu nan, yam rawg ex bwan yam mawx ang ah, caw tix yaogyaw bwan son Siyiex sivoe heue. Khaix haik yaog yaw ex bwan son, ex caw tix kham grawng mawh tix kawn pa iek rieang plak sivoe ngai Siyiex, mai: caw tix pluat ploi krax pa phit pa lud tix sivoe heue. Phan ang kham: krax iek rieag tix, mai: phan ang pluat ploi phimap tix sivoe, bwan son pa keung ex tix pon khankix, phimap pa yuh ex, tieb tie, mai: thox tan: ka bwan son an heue.

Kawn pwi keung tix yaogyaw bwan son, mai: kaung tix tawx min ka Siyiex Cao phan Cao yuh tix, ang jud ang jai heue. Khaix an caw tix pluat ploi phimap tix, kheu Siyiex ex koeng ka phimap mai: moh ka kawn pwi khawm uik heue. Kawn pwi mawh pa ang chix grum naog plak sivoe ngai Siyiex, tix bawg kawx heue. Vieang yuh krax pa mhawm mie ding kawx ang ah, phan deeh tieag cheu tix yaox ka bwan

son Siyiex, hoik awm pa hak " pex ", pa: tawb ka to kaux " sangt " heue. pa tawb sangt ka hak pex, mawh pa ang doh chix kieh to kaux sangt an glip ka tix bawg kawx heue. Awm an krax mhawm pa yuh kawn pwi, ang doh chix hu tieag ka bwan son pa yuh Siyiex heue. Kawn pwi mawh pa iek rieang iek rao tete, mai: caw tix kham grawng krax iek rieang tix plak sivoe ngai Siyiex awm in plak greem heue.

Pa caw tix khyo khaw ka Siyiex, son pa keung pa caw tix yuh mai: pa ang pon yuh khankix, pa awm in plak greem heue.

- Pa cnd pa cha ka pa ca lai klawm glawm paox tix (kalotix, 6:2)
- Pa gla daux krax tan krax lu (Malakhix, 3:8)
- pa ang deuh tix tawng bwan son Siyiex (Romax 1 : 21)
- Pa ang koe krax moh ka pwi tang kaux (I kaw, 13 : 1-3)
- pa ang koe krax caox rhawm ka pwi (Mathiex 23 : 23)
- Pa ang koe krax rawg bwan: (I simieang 2 : 23)
- Pa ang tawng tix teem coi ka pwi tang kaux, (kalatix 5 : 13)
- Pa ang tawng tix goih tawx ka pwi (lox kab 3 : 28)
- Pa ang koe krax pa phat phuk lai Siyiex (2 Temose 5 : 15)
- Pa ang een rhawm ka Siyiex (Romax 14 : 23)
- Pa ang kham sakse grawng Siyiex ka pwi tang kaux (Yezajelax 3 : 18)

Krax Rawg Bwan:

key of - D

	1 -	3	2	1 -	3	4	5-	6-	5 - .
	5 -	1	6	5 -	1	2	3-	4-	3 - .
1.	Krax	pa	rawg	bwan:	mawh	si	awp	si	brawm.
2.	Krax	pa	rawg	bwan:	mawh	krang	naing	pa	mhawm
3.	Krax	pa	rawg	bwan:	mawh	jieak	saw	son	ex
4.	Krax	pa	rawg	bwan:	mawh	A	Lo	Si	Yiex.
	3-	5	4	3-	3	5	1-	1-	1 - .
	1-	1	1	1-	1	1	1-	5-	1 - .

	5	1'-	5-	3	3	4	3	2	- - - (-)
	1	3'-	1-	1-	1	2	1	7	- - - (-)
1.	Mawh	pa	im	ju	daux	khwan	si	ngax.	
2.	Mawh	pa	pex	ka	si	brawm	phi	caox	
3.	Son	sang	paoh	ka	si	viex	rao	ma	
4.	Mawh	pa	thong	gau	Ye	sux	ka	ex	
	5	5-	1'	1'	5	5	5	5	- - - (-)
	1	1-	1-	2	2	2	2	5,	- - - (-)

	1-	3	2	1-	3	4	5-	u-	6 - .
	5-	1	6	5-	1	2	3-	3-	4 - .
1.	Yam	koe	pa	nu	mai:	ceu	pa	khi	rhawm
2.	Vieang	koe	pa	tieb	tie	ka	daux	ju	maix
3.	Can	pa	lo	son	maix	ku	ceu,	khawm	uik
4.	Nawh	Cao	rawg	bwan	tom	hoek	pieang	khaox	lhak
	3-	5	4	3-	3	5	1'-	5-	3 - .
	1-	1	1	1-	1	1	4,-	4,-	4,- .

1'	5-	3-	2	4	3	2	1	- - - (-)
3	3-	1-	1	1	1	1	1	- - - (-)
Krax	rawg	bwan	mawh	rieang	rao	son	ex	
Krax	rawg	bwan	mawh	pa	pex	khawm	uik	
Tak	grum	naog	kheu	krax	pa	rawg	bwan	
ot	daux	krax	paton	rawg	bwan	jheeng	jheeng	
1'	1'-	5-	3	4	5	4	3	- - - (-)
1	1-	3,-	5,	5,	5,	5,	1	- - - (-)

1'	17	6	—	—	1'	76	5	—	—
5-	5-	4	—	—	5-	-4-	3	—	—
Een	rhawm	heue.			rawg	bwan	heue.		
Een	rhawm	een	rhawm	heue.	rawg	bwan	rawg	bwan	heue.
1'	1'	1'	1'	1'	1'	7-	1'	5	1-
4-	4-	4	4	4-	4-	1-	1	1	1-
5-	1'	6	5-	4	3	2	—	—	(-)
3-	5	4	3-	1	1	7	—	—	(-)
kieh	krax	rawg	bwan	maix	kaux	cong			
1-	5	5	5-	5	5	5	—	—	(-)
1-	1	3	3-	1	1	5,	—	—	(-)

3-	32	1	—	—	5-	u-	6	—	—
1	16	5	—	—	3-	3-	4	—	.
Yum	rhawm	heue.			Baox	rawg	heue.		
Yum	rhawm	yum	rhawm	heue.	Baox	rawg	baox	rawg	heue.
5-	56	3	3	3-	5-	5-	1'	1'	1'-
1-	1-	1	1	1-	1-	1-	4	4	4 -
1'	5-	3-	2	4	3	2	1	—	(-)
3	1-	1-	1	2	1	1	5	—	(-)
Si	yiex	sang	teen	coi	maix	jheeng	jheeng		
1'	1'-	5-	3	4	5	4	3	—	(-)
1	1-	3-	5	5	5,	5,	1	—	(-)

LoxTawm:

Mawh kheu Siyiex paoh daux krax ka son ex, mai: ex baox pon akhwang: tix tiem lai grawng: cao giex kaing: plak kawn Khrit mai: pa im ju daux krax rawg bwan:heue. In mawh daux krax pa cox pa khre Siyiex, pa mawh ceu pa ting bwan:son tete telai heue. Mawh kheu nan, exyaog yaw bwan son Simieang Siyiex ting ting lhaong lhaog heue.

Krax pa bak pa keut ex son pa tiem ex lai in, mai: yuh mawh phuk lai ieak tix phuk, kheu keut pot jun pot ex tix sang kieh mawh pa teei rieang rao, son cao giex kaing: khawm uik heue. Cao giex kaing plak numli, Cao giex kaing: plak baux veng, cao giex kaing: plak ceucago, cao giex kaing: plak nyiex ma kawn Khrit khankix, mai: cao giex kaing: ka dau cubcaw, mai: cao giex kaing: kawn Khrit dee yuh kaing ku dah ku dee heue. Phuk lai in, ex keut sonsang chix shao ka son pa gau, yam yuh krax gau ka dee mawx angah heue. Ex tiem lai in, sonsang mawh pa kieh kawn khrit khawm uik khaw caw daux krax daux blawng: krax rawg bwan,:mai: sonsang viex kawn Ceucao ku kaux khawm rhawm khawm rhi tix rawg bwan:rawx rawx mox mox, kriem kriem krie krie heue.

Kieh bwan son pa nhim pa gaux rhawm, mai: bwan:son pa ting rieang daux krax rawg bwan lih grum lih naog ka pieang can pwi pa phat lai in, mai: pa shao kieh koe bwan,:mai: pa coca tix hawt jawh yuh awm pa hoik mhong hoik tawng tix ku kaux daux pwi lieak.

Rev. Ngox Khun Pen
Cao Bung: Kaing Ku Ceu
Numli Vax Kawn Khrit Com Rawm: